

1,2 miljuunaa kruunua kväänitten aktiviteetile

Arbeids- og inkluderingsdeparttimentti oon antanu rahhaa eli kuurttoa seittemälle eri aktiviteetile, joissa kaikissa haluthaan vahvistaa ja kehittää kväänin kieltä ja kulttuuria. Isovuonon komuuni saa 500 000 kruunua kielisentteriä varten.

- Rejeeringin tarkotus oon vahvistaa ja kehittää kväänin kieltä. Jotta met klaaraama tämän, niin met tarttama lukaaliita tiltaakkia. Sen tähän mie olen rohki ilonen, ette kväänimiljöössä tapattuu niin paljon, sannoo arbeids- og inkluderingsministeri Dag Terje Andersen. – Näin rejeerinki satsaa kans regiunaalhiin kvääni-infrastryktyyrhiin, jatkaa Andersen.

Halti kväänikulttuurisentteri oon saanu prošektirahhaa 250 000 kruunua. Het aijothaan dokumenteerata ja tua esile kväänikulttuuria Tromssassa, työtellä positiivisen kehityksen etheen ja revitaliseerata kväänin kieltä ja kulttuuria Pohjais-Tromssassa. Kuurttto mennee Halti kväänikulttuurisentteri IKS kautta, mikä laitethaan ylös vuona 2009.

Departtimentti antaa rahhaa Varangerin museolle 100 000 kruunua Vesisaaren kväänin kielisentterin suunnittelhuun. Lisäksi museo oon saanu 60 000 kruunuu prošektile "Kvenske navn på nett og kart". Prošektin tarkotus oon kerätä ja kvaliteetitarkistaa kvääninkielisiä paikannimiä.

Kvenlandsforbundet oon saanu 144 000 kruunua. Het aijothaan saaja enämen yhtheistyötä kväänitten ja muitten suomalaisugrilaisitten minoriteetitten välilä.

Kolmekieliset aktiviteetit

Monet komuunit, joissa puhuthaan suomen-/ kväänin kieltä, saamea ja norjaa, defineerathan ittensä kolmekulttuuriseksi. Isovuonon komuuni saa 500 000 kruunua, ja sen tarkotuksena oon laittaa ylös kielisentterin, mikä kuuluu prošektiin "Mangfold styrker". Kielisentterin alle kuuluthaan kaikki komuunin kielet. Lisäksi komuuni saa 70 000 kruunua, jotta se saattaa laittaa ylös työsakin. Työsaki aikoo löytää kelelisten minoriteetitten representanttia, jotka saatethaan aktiivisesti työtellä kielen ja kulttuurin etheen. Porsangin komuuni aikoo kans nostaa ylös kolmekielisen kompetanssin omassa komuunissa, eriliikkasesti lapsitten ja nuoritten kansa. Sen tähän komuuni halvaa, ette kulttuurikoulun nettilaita olis kolmela kielelä. Rejeerinki oon antanu rahhaa 70 000 kruunua, jotta Porsangin kulttuurikoulun nettilaijan tekstit olis kans kväänin kielelä.

Kvääniaviisi Ruijan Kaiku on jo saanu 400 000 kruunua departtimentiltä. Lisäksi on Norsk kulturråd antanu aviisille 1 miljuunaa kruunua. Norske Kveners forbund on saanu kuurttoa 1,5 miljuunaa vuele 2009. Norsk-Finsk forbund on tänä vuona kans päässy kuurtto-oortningin alle, ja on saanu 250 000 kruunua vuele 2009. Lisäksi on Kultur- og kirkedeparttimenti lisäny kuurttoa Kainun institutile 1 miljuunan. Kainun institutti saa nyt yhtheensä 4,5 miljuunaa kruunua.